



Bentiaraq Ottosen
Atassut

UKA 2023/112
18. oktober 2023

0,25 literi tikillugu imaqarsinnaasumut imeruersaatit puuinut akitsuut (Akitsuutit normuat 034) aammalu 0,25 literi sinnerlugu imaqarsinnaasumut imersuersaatit puuinut akitsuut (Akitsuutit normuat 035), §1 imm.1, nr.6-mi litra a aamma litra b allassimasut peerneqarsinnaaqullugit Inatsisartut Inatsisaannut nr.17 22. november 2011-meersumut allannguutissatut siunnersuummik saqqummiussinissamut Naalakkersuisut peqquneqarnissaat pillugu Inatsisartunut aalajangiiffigisassatut siunnersuut.

(Inatsisartunut Ilaasortaq Jens-Frederik Nielsen, Demokraatit)

Siullermeenera

Nunatsinni akitsuutinik eqqussuiuarneq akilersinnaanngitsoq Atassummiit isumaqarpugut, akileraarutit apparluarneratigut, ilanngaatit assigiinngitsut, akitsuuterpassuillu piaarneqarsinnaagaluarput taamaasilluni aamma allaffissornerujussuit annikillisinneqarnissaat anguneqarsinnaalluni. Tassa taamatut ajornaatsigigaluarpoq maani ilinniartitsissalluni.

Pingaaruteqarluinnarpoq akitsuutinik eqqussuisoqannginnissaa, inuuniarneq taamak maannakkut akisulluinnareertigisoq qaavatigut akitsuusersuisoqaannassappat ullumikkumit inuiaqatigiit nioqqutissanik pisisinnaassusaat annikitsuararsuussaaq. Ulluni makkunani nunatsinni nalaapparput nioqqutissat akiinik annertuupilussuarmik akitsorterineq, tamannalu nalaanneqaqqissanngitsoq Atassummiit sakkortuumik Naalakkersuisunut kaammattuivugut.

Siunnersuuteqartup siunnersuutaa taperserluinnarparput, kisianni mianersoqqullugu ukiup nutaamiit imeruersaatit pillugit qillertuusanut tuniniaanermi tunngasut eqqarsaatigalugit namminersortut suliffeqarfiutillit ernumassuteqarput. Tamanna apeqqusermassuk ullumikkumit akigititaasumit qaffasinnerusumik akilersillugit tuniniaanissaminnik. Nunatsinni namminersortut suliffeqarfiutillit akilersinnaanerusumik ingerlatsinissaat pisariaqarluinnarpoq, artukkiiginnarluta qitiusumiit aqutsineq qimattariaqaripput isumaqarpunga, allaffissornerujussuaq annikillisillugu angusariaqaripput.

Inuit ulluinnarni pisisinnaanerulernissaat anguniartuarput, tamatuminnga pingaarnertut oqaatiguarparput imminut pilersorsinnaaneq aamma imminut napatissinnaaneq kisiannili aamma akeqarpoq tamanna. Ilanngaatit assigiinngitsut piiarneqarnissaat qaqittarsimavarput, tamakkua isumaqarpunga piarneqarpata malitsigisaanik akileraarutit appartinneqarnissaanut kinguneqarsinnaasoq. Tamakkua ila oqallisigiinnarnagit imaluunniit ilinniartitsissutiginnarnagit piiarnartigit, taamaasiorutta inuuniarneq oqinnerulissagaluarpoq ataasiakkaarlugit piaaginnarata.

Siunnersuuteqartoq oqareernittuut tapersorsorparput, siunnersuulli aningaasaqarnermut akileraartarnermullu ataatsimiititaliamut innersuullugu.